

Broj: 01-02-3-2177/16
Sarajevo, 28.12.2016. godine

Z A P I S N I K
13. REDOVNE SJEDNICE PREDSTAVNIČKOG DOMA PARLAMENTA
FEDERACIJE BIH, održane 13.12.2016. godine

Sjednica je počela u 10.13.

Sjednici je predsjedavao predsjedavajući Predstavničkog doma Parlamenta Federacije BiH Edin Mušić.

Predsjedavajući Mušić pozdravio je zastupnice i zastupnike, članove Vlade Federacije BiH, goste kao i predstavnike akreditiranih medijskih kuća koji prate rad sjednice.

Odsustvo sa sjednice opravdali su: Kenela Zuko, Ilhan Bušatlić, Hasan Muratović, Vjekoslav Bakula, a kašnjenje su najavili Azra Hadžiahmetović i Midhat Karović.

Prema evidenciji Stručne službe, predsjedavajući je konstatovao da sjednici prisustvuje dovoljan broj zastupnika za kvalitetan rad i odlučivanje.

Zapisnici 13. i 14. vanredne sjednice usvojeni su bez primjedbi.

Prešlo se na izjašnjavanje o predloženim inicijativama.

Jasmin Kadić pokrenuo je inicijativu za održavanje tematske sjednice na kojoj će se raspravljati o statusu elektroenergetskih projekata Blok 7 Termoelektrana Tuzla, Termoelektrana Banovići, Vjetroelektrana Podveležje i drugih započetih elektroenergetskih projekata, a koja nije usvojena (29 glasova za, sedam glasova protiv i 35 uzdržanih glasova).

Mujo Hasić pokrenuo je inicijativu da Predstavnički dom Parlamenta Federacije BiH što prije usvoji sortnu listu EU a što nije usvojeno (25 glasova za, četiri glasa protiv i 42 uzdržana glasa).

Dennis Gratz pokrenuo je inicijativu prema Predstavničkom domu i Vladi Federacije BiH za sazivanje tematske sjednice o iseljavanju stanovništva sa područja Federacije ali i cijele BiH a što nije usvojeno (23 glasa za, pet glasova protiv i 42 uzdržana glasa).

Usljedilo je izjašnjavanje o dobivenim odgovorima.

Dženan Đonlagić nije zadovoljan odgovorima na dva postavljena pitanja. Jasmina Zubić nije zadovoljna odgovorima koje je dobila od kantonalnih ministarstava i kantonalnih zavoda zdravstvenog osiguranja i Vijeća ministara, te je dala komentare. Mensud Borović dao je komentare na odgovore. Slavica Josipović izrazila je nezadovoljstvo zbog nedobivanja odgovora na postavljena pitanja. Muhamed Ibrahimović također je komentirao odgovore koji se tiču Zakona o koncesijama. Jasmin Kadić komentirao je dobivene odgovore ali je i kazao da na neka pitanja još nije dobio odgovore. Alma Arnaut kazala je da nije dobila odgovore na postavljena pitanja. Mehrudin Švago komentirao je odgovor na pitanje koje je uputio Cestama Federacije. Azra Hadžić nije zadovoljna odgovorom kojeg je dobila a tiče se statusa mladih. Enver Bijedić nije zadovoljan odgovorima, te je dao kratak komentar. Dennis Gratz izrazio je nezadovoljstvo odgovorom kojeg je dobio od ministrice Dilberović, te traži da mu Ministarstvo u što skorijem periodu dostavi tražene materijale.

Zastupnička pitanja

Mahir Mešalić postavio je pitanje vezano za inicijativu koju je pokrenuo a koja je usvojena u Domu (da se 25.maj proglasi Danom žalosti u Federaciji BiH), pita – šta je sa tim budući da nije bio proglašen Dan žalosti.

Drugo pitanje već je postavljao ministrici finansija i opet ga ponavlja a odnosi se na 50 najvećih primanja u institucijama u Federaciji i u državnim kompanijama.

Traži odgovor od Vlade Federacije BiH vezano za Nacrt Zakona o stečaju kojeg je predložio, te da li ga je Vlada uopće dobila.

Nasir Beganović pitanje je uputio Elektroprivredi BiH, resornom ministarstvu i Vladi Federacije BiH-budući da će kantonalni zavodi zdravstvenog osiguranja u narednom periodu ukinuti ovjeru knjižica rudarima - da li Vlada, resorno ministarstvo i Elektroprivreda BiH imaju plan šta će po tom pitanju učiniti? Zahtjeva da mu se dostavi plan šta je do sada učinjeno i šta će se dalje činiti po tom pitanju. Apelira da odgovorni riješe taj problem.

Damir Mašić prvo pitanje uputio je federalnoj ministrici finansija i Vladi Federacije BiH – kako Vlada i Ministarstvo planiraju nadomjestiti nedostajuća sredstva za servisiranje planiranih budžetskih obaveza?

Drugo pitanje odnosi se na Federalno ministarstvo rada i socijalne politike - kada će u Parlament doći izmjene Zakona o radu i kada će vratiti nadležnost Federalnoj inspekciji rada? Budući da Vlada nije usvojila amandmane na Zakon o radu, apelira da to učini.

Elma Đogić prvo pitanje uputila je Ministarstvu prometa i komunikacija BiH – kolika je prosječna frekvencija putničkih automobila i teretnih vozila na ulazu i izlazu graničnog prijelaza Velika Kladaša–Maljevac u posljednjih pet godina? Koliko je zabilježeno ulaza a koliko izlaza putničkih i teretnih vozila, posebno u 2015. i 2016. godini, te da li su poduzete određene aktivnosti u vezi modernizacije i proširenja ovog graničnog prijelaza?

Drugo pitanje postavila je Federalnoj upravi za inspekcijske poslove – koliko je u vršenju pojačanog nadzora u unutrašnjoj kontroli poslovanja privrednih subjekata izvršila kontrola u periodu od 03.10.2016. do 14.11.2016. godine na području Unsko-sanskog kantona i Općine Velika Kladaša? Kakve rezultate je ostvarila?

Treće pitanje uputila je Federalnom ministarstvu razvoja poduzetništva i obrta – sa kojim pravnim i fizičkim licima sa područja Federacije je ovo Ministarstvo potpisalo ugovore o dodjeli bespovratnih poticajnih sredstava u ukupnoj vrijednosti od 3.873,350 KM; Kroz koje projekte su poticajna sredstva u 2016. godini dodjeljivana pravnim i fizičkim licima sa područja Federacije? Traži pregled realizirane Grant sheme - unapređenje poduzetničkih zona u Federaciji, kao i podatak kojim pravnim i fizičkim licima su dodjeljena poticajna sredstva?

Aiša Čenanović pitanja je uputila Poreznoj upravi Federacije BiH – traži da joj se dostavi informacija o primjeni člana 3. stav 3. Zakona o izmjenama i dopunama Zakona o doprinosima, traži odgovore na pitanja - koliko je privrednih društava u 2015. godini obračunavalo doprinose za sve ili dio radnika koristeći povoljnosti ovog Zakona? Koja su privredna društva u 2015. godini za više od deset svojih zaposlenika obračunavala jedan ili više mjeseci doprinose koristeći ovu povoljnost? Ako je kontrola u posljednjih pet godina utvrdila zloupotrebu ove povoljnosti na način da obveznik razliku plate isplaćuje kroz neoporeziva davanja i slično, koliko je obračunato dodatnih obaveza tim obveznicama? Traži od Porezne uprave Federacije BiH, Federalnog ministarstva finansija i Federalnog ministarstva energije, rudarstva i

industrije ocjenu, da li postoji potreba za dalju primjenu ovog Zakona ili on služi za ekstra profite u nekim biznisima?

Rusmir Mesihović prvo pitanje uputio je Vladi Federacije BiH-kada će u proceduru uputiti Zakon o javnom i privatnom partnerstvu?

Drugo pitanje - kada će se uspostaviti i implementirati preventivni program ranog otkrivanja raka debelog crijeva na teritoriji Federacije BiH?

Pokreće inicijativu za donošenje strategije za palijativnu njegu ili jedinstvenog programa unapređenja razvoja palijativne njege u Federaciji BiH.

Emina Mutap pitanje je uputila Elektroprijenosu BiH - da li je i kada planirana gradnja 110 kilovoltne trafostanice u Željuši, Mostar?

Bajro Makić pitanje je uputio Poreznoj upravi Federacije, kojim traži podatke o broju radnika i iznosu plaćenih doprinosa po općinama Srednjo-bosanskog kantona po mjesecima za 2016. godinu sa posebnim akcentom na plaćanje doprinosa za zdravstveno osiguranje.

Drugo pitanje za JP Elektroprivreda HZHB a odnosi se na raspisani javni oglas za prijem radnika u radni odnos na neodređeno vrijeme, te traži spisak svih prijavljenih kandidata, spisak primljenih, kao i kriterij za odabir.

Mira Grgić prvo pitanje uputila je Federalnom ministarstvu energetike, rudarstva i industrije i premijeru Novaliću – da li je sukob interesa to što su dva od tri člana Upravnog odbora Tvornice namjenske proizvodnje “Binas” iz Bugojna supružnici Orhana Burek i Mehrid Omerinović, koji ni po struci, ni po radnom iskustvu nemaju dodirnih tačaka sa namjenskom industrijom?

Drugo pitanje upućeno je ministru Ramiću - da li će konkurs koji je raspisan za studente povratnike u RS biti raspisan i za studente povratnike u Federaciju?

Kasim Mulalić traži poduzimanje radnji na provjeri i preispitivanju prodaje državnog zemljišta. Traži od Vlade, Porezne uprave, Agencije za privatizaciju i Federalnog pravobranilaštva da mu dostave odgovor o prodaji državnog zemljišta u Općini Bužim.

Boris Barun pitanje je uputio Vladi Unsko-sanskog kantona – zašto nisu isplaćene plate za deveti i deseti mjesec uposlenicima Katoličkog-školskog centra u Bihaću?

Mirsad Topčagić pitanje je uputio Federalnom ministarstvu poljoprivrede, vodoprivrede i šumarstva – kojim privatnim preduzećima i poduzetnicima sa područja Unsko-sanskog kantona je Ministarstvo isplatilo poticaje za poljoprivredu, veterinarstvo u vidu subvencija za 2016. godinu i sa kojim pojedinačnim iznosima?

Alma Kratina prvo pitanje uputila je Federalnom ministarstvu zdravstva i Federalnom zavodu zdravstvenog osiguranja - da li raspolaže informacijom da su djeca dijabetičari u Federaciji BiH izloženi diskriminaciji i nemaju prava na paket zdravstvenih usluga? Napomenula je da je ova informacija trebala biti obznanjena prije tri mjeseca nakon istrage ombudsmena za ljudska prava BiH i utvrđivanja te činjenice. Da li je dostavljena informacija Federalnom zavodu zdravstvenog osiguranja i reosiguranja i Federalnom ministarstvu zdravstva o tome da li se postupilo po preporukama ombusmena za ljudska prava, jer su bili dužni da u roku od tri mjeseca nakon provedene istrage tu informaciju dostave.

U skladu sa ovim, pokreće inicijativu za izmjenu i dopunu Odluke o utvrđivanju osnovnog paketa zdravstvenih prava u dijelu tačke 9. stav 2. 1d) kako bi se stvorio pravni osnov da se iz sredstava Fonda solidarnosti Federacije BiH pored nabavke aparata za kontrolu dijabetesa i trakica za šećer predviđenu za djecu dijabetičare uvede i pravo na inzulinske pumpe za svu djecu dijabetičare kod kojih je inzulinska pumpa medicinski indicirana bez obzira na njihov status zdravstvenog osiguranja.

Naredno pitanje - u kojoj fazi je imenovanje novog Upravnog odbora Federalnog zavoda zdravstvenog osiguranja i reosiguranja i na koji način se donose odluke od februara 2016. godine, kada je istekao mandat ovom Upravnom odboru.

Adžem Dževad pitanje je uputio ministru Joziću a tiče se statusa Nacrta Zakona o razvojnom planiranju, te kada će biti u proceduri.

Drugo pitanje uputio je pisanim putem.

Amra Kunovac prvu inicijativu pokrenula je prema Vladi, kojom traži hitno obezbjeđenje sredstava za finansiranje aktivnosti u roditeljskoj kući za djecu oboljelu od raka i njihove roditelje koji dolaze van Kantona Sarajevo. Apeluje da se izdvoje određena finansijska sredstva kako bi roditeljska kuća nastavila sa radom.

Druga inicijativa kojom od Vlade Federacije BiH traži da u svom budućem radu na internet stranici postavi godišnji plan programa sa svim informacijama.

Pitanja je uputila Federalnom ministarstvu okoliša i turizma - koje općine u Federaciji vrše reciklažu otpada? Koliko od ukupnog otpada u Federaciji se reciklira i da li su donijeli propise kojim je regulisan način i tok prikupljanja informacija o otpadu?

Amra Haračić prvo pitanje uputila je Federalnom ministarstvu zdravstva – u kojoj fazi je realizacija inicijative za izmjenu Plave knjige koju je Zavod zdravstvenog osiguranja HNK pokrenuo u aprilu, koji su konkretni koraci koje ministarstvo namjerava poduzeti kada je riječ o ujednačavanju stomatoloških usluga za djecu sa teškoćama u razvoju na području cijele Federacije.

Inicijativu upućuje predsjedavajućem Predstavničkog doma Edinu Mušiću, te napominje da se već obraćala Federalnom ministarstvu turizma i zaštite okoliša a u vezi inicijative i pitanja koja se tiču zagađenja zraka u Lukavcu. U aprilu je organizovala Okrugli sto koji se bavio temom katastrofalnog ekološkog stanja u Lukavcu. Iz Federalnog ministarstva se niko nije odazvao. Smatra da Parlament mora posvetiti dužnu pažnju ovom problemu i zakazati tematsku sjednicu na kojoj će se utvrditi direktan utjecaj ovakvog stanja na zdravlje ljudi.

Jasmin Kadić prvo pitanje uputio je predsjedavajućoj Doma naroda i predsjedavajućem Predstavničkog doma Parlamenta Federacije BiH – da li je prekršen Poslovnik Doma naroda kada je na sjednici 08.12.2016. odbijeno da se Zakon o igrama na sreću razmatra po hitnom postupku, te je na istoj sjednici razmatran i usvojen u formi nacrta. Predsjedavajući Mušić dao je dogovor na pitanje koje mu je postavljeno.

Naredno pitanje odnosi se na Elektroprivredu HZHB, budući da se nije razmatrao Izvještaj o radu i poslovanju elektroprivreda, pita - kada će se ti izvještaji naći na dnevnom redu?

Pitanje je postavio Federalnom ministarstvu energije, rudarstva i industrije od kojeg traži informaciju šta je sa energetske projekta Bloka 7 Termoelektrane Tuzla i Termoelektrane Banovići.

Pitanje je postavio ministrici obrazovanja Elviri Dilberović – kako je moguće da učenici osvajači medalja na olimpijadama iz matematike i fizike nisu nagrađeni od ovog Ministarstva i pored činjenice da se imala informacija o njihovim uspjesima. S tim u vezi upućuje inicijativu Vladi da za ove učenike organiziraju prijem i uruče nagrade za uspjeh.

Zlatko Kravić pitanje je postavio pisanim putem.

Jasna Duraković-Hadžimerović pitanje je postavila ministrici Dilberović i kantonalnom ministru obrazovanja Kazazoviću a tiče se Nacrta Zakona o visokom obrazovanju u Kantonu Sarajevo, te izrazila svoje nezadovoljstvo usvajanjem tog Zakona, i dala obrazloženje. Pita – čemu služi Federalno ministarstvo obrazovanja i

nauke, kakava je uloga ministrice kada je dozvolila da ovakav nacrt Zakona bude usvojen? Također, poziva na odgovornost ministra Kazazovića i pita – do kada će zagovarati ovakve antiakademske kampanje i svjesno uništavati kulturu jednog naroda kroz rušenje njegovog obrazovnog sistema; Ko su članovi komisija koje su donijele ovaj nacrt Zakona i da li postoji mogućnost da se ta komisija proširi kada se bude donosio prijedlog Zakona, kako bi se dozvolilo učešće ljudi od struke i nauke? Šta Ministarstvo može poduzeti da se ovo ne završi pogubno za nauku i akademiju?

Naredna pitanja uputila je federalnim resornim ministarstvima, šta je sa obećanjem da će se iznaći rješenje za porodilje u Federaciji BiH? U kojoj su fazi implementacije rješenja od strane ovih resornih ministarstava i koje aktivnosti su poduzete? Ko radi na tome da se zaštite prava majki u Federaciji? Koje aktivnosti su provedene? Traži izvještaj po ovom pitanju.

Alma Arnaut pitanje će uputiti u pisanoj formi.

Jusuf Bubica pitanje je uputio Vladi Federacije BiH a odnosi se na cjevovod Zenica-Travnik – ko je kriv zbog toga što je realizacija projekta započeta prije nego što je izvršena realizacija istog? Ko je kriv za nedostatke u projektu i zbog čega ovaj projekat nije pušten u funkciju?

Drugo pitanje koje se odnosi na status javnih preduzeća i drugih preduzeća koja su u vlasništvu Vlade Federacije BiH, pa predlaže: da se urade nove sistematizacije koje će biti usaglašene sa evropskim normama za sva radna mjesta u javnim preduzećima; da se Vlada odredi koja od tih preduzeća su teret za Vladu i koja bi mogla biti predložena za privatizaciju?

Pokreće inicijativu prema predsjedavajućem Doma da se poštuje Poslovnik i da se vrijeme za postavljanje pitanja svede na mjeru predviđenu Poslovnikom.

Prešlo se na utvrđivanje dnevnog reda.

U raspravi o izmjenama i dopunama dnevnog reda učestvovali su: Mahir Mešalić, Dženan Đonlagić, Elvir Karajbić, Ismet Kurić, Ismet Osmanović, Jozo Bagarić i Dennis Gratz.

Prijedlog Ismeta Kurića da se sa dnevnog reda skine tačka 3. Prijedlog Zakona o penzijskom i invalidskom osiguranju nije usvojen (16 glasova za, 27 glasova protiv i 21 uzdržani glas).

Klubovi zastupika SDPBiH i DF, tražili su da na Kolegiju budu prisutni predstavnici Sindikata solidarnosti, vezano za Nacrt Zakona o stečaju a što nije usvojeno (25 glasova za, 23 glasa protiv i 25 uzdržanih glasova).

Sa 55 glasova za, 11 glasova protiv i uz 12 uzdržanih glasova, usvojen je sljedeći:

D N E V N I R E D

1. Prijedlog Zakona o izmjeni Zakona o doprinosima – skraćeni postupak,
2. Prijedlog Zakona o dopuni Zakona o visini stope zatezne kamate - skraćeni postupak,
3. Prijedlog Zakona o penzijskom i invalidskom osiguranju,
4. Prijedlog Zakona o dobrovoljnim penzijskim fondovima,
5. Nacrt Zakona o stečaju,
6. Nacrt Zakona o izmjenama i dopunama Zakona o unutrašnjoj trgovini,
7. Prijedlog Odluke o utvrđivanju Programa statističkih istraživanja od interesa za Federaciju BiH za period 2017.-2020. godina,
8. Prijedlog Odluke o davanju saglasnosti na obračun sredstava u zdravstvu u Federaciji BiH za 2015. godinu,
9. Izbori i imenovanja.

Predsjedavajući je napravio petominutnu pauzu i pozvao članove Kolegija na kratku konsultaciju. Nakon pauze odlučeno je da Odbor za rad i socijalnu zaštitu primi delegaciju Sindikata solidarnosti u vezi Nacrta Zakona o stečaju, te da predsjednik Odbora upozna Dom sa stavovima.

1. Prijedlog Zakona o izmjeni Zakona o doprinosima – skraćeni postupak

Prijedlog Zakona utvrdila je Vlada Federacije BiH.

Prijedlog Zakona razmatrala su nadležna radna tijela i dostavila izvještaje.

U ime Vlade Federacije BiH dodatno obrazloženje dala je Mira Bradara, te traži da se uvaži tehnička ispravka, tako da se u članu 1., "12 mjeseci" mijenja sa "24 mjeseca".

Predsjedavajući je kazao da su na ovaj Prijedlog Zakona amandamane podnijeli Mensud Borović i Jasmin Kadić. Amandmani nisu podneseni u roku, tako da se neće razmatrati.

Prije otvaranja pretresa predsjedavajući je, na osnovu člana 172. stav 3. Poslovnika, kazao da se ne radi o složenom i obimnom zakonu te pozvao zastupnike da se izjasne da li će se razmatrati po skraćenom postupku, a što je usvojeno (sa 56 glasova za, jednim glasom protiv i uz dva uzdržana glasa).

U raspravi su učestvovali: Jasmin Kadić i Mensud Borović.

Sa 61 glasom za, pet glasova protiv i uz četiri uzdržana glasa, usvojen je Prijedlog Zakona o izmjeni Zakona o doprinosima.

2. Prijedlog Zakona o dopuni Zakona o visini stope zatezne kamate - skraćeni postupak

Prijedlog Zakona utvrdila je Vlada Federacije BiH.

Prijedlog Zakona razmatrala su nadležna radna tijela i dostavila izvještaje.

U ime Vlade Federacije BiH dodatno obrazloženje dala je Mira Bradara.

Prije otvaranja pretresa predsjedavajući je, na osnovu člana 172. stav 3.

Poslovnika, kazao da se ne radi o složenom i obimnom zakonu te pozvao zastupnike da se izjasne da li će se razmatrati po skraćenom postupku, a što je usvojeno (sa 53 glasa za, 13 glasova protiv i uz četiri uzdržana glasa).

U raspravi je učestvovao Nasir Beganović.

Sa 58 glasova za, osam glasova protiv i uz sedam uzdržanih glasova, usvojen je Prijedlog Zakona o dopuni Zakona o visini stope zatezne kamate.

3. Prijedlog Zakona o penzijskom i invalidskom osiguranju,

Prijedlog Zakona utvrdila je Vlada Federacije BiH.

Prijedlog Zakona razmatrala su nadležna radna tijela i dostavila izvještaje.

Nacrt ovog Zakona usvojen je u Predstavničkom domu na 11. redovnoj sjednici 18.05.2016. godine.

U ime Vlade Federacije BiH dodatno obrazloženje dao je ministar Vesko Drljača, te kazao da amandmane koje su podnijeli zastupnici Vlada nije prihvatila. Vlada Federacije BiH podnijela je tri amandmana koji postaju sastavni dio prijedloga Zakona. Predsjedavajući je kazao da je značajan broj amandmana podnesen izvan predviđenog roka.

U raspravi su učestvovali: Alma Kratina, Elvir Karajbić, Jasmina Zubić, Ismet Osmanović, Dennis Gratz, Amra Kunovac, Azra Hadžiahmetović, Jozo Bagarić, Ismet Kurić i Faruk Čupina.

Pauza do 15,15.

Nakon pauze nastavilo se sa radom.

Ministar Vesko Drljača dao je pojašnjenje i kazao da je Vlada održala telefonsku sjednicu te da je pored amandmana koji su postali sastavni dio prijedloga Zakona, Vlada dostavila još tri amandmana, koji također postaju sastavni dio prijedloga Zakona (na član 27. stav 1., na član 140. stav 1., i na član 131. stav 1.)

Prešlo se na izjašnjavanje zastupnika o amandnima.

Amandman Alme Kratina na član 69. nije usvojen (32 glasa za, 11 glasova protiv i dva uzdržana glasa).

Anela Šestić – Begović povukla je predloženi amandman.

Amandman Ismeta Osmanovića na član 59. novi stavovi 2.,3.,4. i 5. nije usvojen (40 glasova za, 15 glasova protiv i 26 uzdržanih glasova).

Amandman I. Jasmine Zubić (član 8. stav 1.) nije usvojen (23 glasa za, 13 glasova protiv i 37 uzdržanih glasova). Amandman II. Jasmine Zubić (član 33. stav 6.) nije usvojen (17 glasova za, 12 glasova protiv i 43 uzdržana glasa). Amandman III. Jasmine Zubić (član 46. stav 5.) nije usvojen (22 glasa za, 12 glasova protiv i 43 uzdržana glasa). Amandman IV. (član 49. stav 2.) nije usvojen (15 glasova za, 17 glasova protiv i 37 uzdržanih glasova). Amandman V. (na član 83.) nije usvojen (17 glasova za, 16 glasova protiv i 35 uzdržanih glasova). Amandman VI. (član 96. stav 1.) nije usvojen (18 glasova za, 17 glasova protiv i 39 uzdržanih glasova). Amandman VII. (član 97. stav 1. i 2.) nije usvojen (24 glasa za, 17 glasova protiv i 36 uzdržanih glasova). Amandman VIII. (član 99. stav 1. novi stav 2. i 3.) nije usvojen (27 glasova za, 17 glasova protiv i 37 uzdržanih glasova). Amandman IX. (član 107. novi stav 3. i 4.) nije usvojen (22 glasa za, 21 glas protiv i 35 uzdržanih glasova). Amandman X. (novi član 138.) nije usvojen (21 glas za, 19 glasova protiv i 33 uzdržana glasa).

Sa 53 glasa za, 17 glasova protiv i uz 14 uzdržanih glasova, usvojen je Prijedlog Zakona o penzijskom i invalidskom osiguranju.

4. Prijedlog Zakona o dobrovoljnim penzijskim fondovima

Prijedlog Zakona utvrdila je Vlada Federacije BiH.

Prijedlog Zakona razmatrala su nadležna radna tijela i dostavila izvještaje.

Nacrt ovog Zakona usvojen je u Predstavničkom domu na 8. redovnoj sjednici 23.02.2016. godine.

U ime Vlade Federacije dodatno obrazloženje dala je Mira Bradara.

U raspravi su učestvovali: Dennis Gratz, Faruk Čupina, Davor Vuletić i Elvir Karajbić.

Sa 53 glasa za, 21 glas protiv i uz osam uzdržanih glasova, usvojen je Prijedlog Zakona o dobrovoljnim penzijskim fondovima.

5. Nacrt Zakona o stečaju

Nacrt Zakona utvrdila je Vlada Federacije BiH.

Nacrt Zakona razmatrala su nadležna radna tijela i dostavila izvještaje.

U ime Vlade Federacije BiH dodatno obrazloženje dao je ministar Jozić.

U međuvremenu završio je sastanak sa predstavnicima Sindikata solidarnosti, te je predsjednik Odbora za rad i socijalnu zaštitu Refik Hankić izvjestio Dom o sasatanku.

U raspravi su učestvovali: Nasir Beganović, Dženan Đonlagić, Refik Hankić, Elvir Karajbić, Almir Zulić, Jusuf Bubica, Amra Haračić, Suzana Franjka Galić, Faruk Ćupina, Davor Vuletić i Jasmin Kadić.

Predložen je zaključak o kojem su se zastupnici izjašnjavali.

Sa 51 glasom za, 20 glasova protiv i uz četiri uzdržana glasa, usvojen je sljedeći:

Z A K L J U Č A K

Predstavnički dom Parlamenta Federacije BiH prihvata Nacrt Zakona o stečaju, i smatra da može poslužiti kao dobra osnova za izradu prijedloga Zakona.

Zadužuje se predlagač da provede javnu raspravu u trajanju od 45 dana, te da prilikom izrade prijedloga Zakona ima u vidu sve sugestije, primjedbe i prijedloge iznesene u raspravi kao i one koje su dostavljene ili će biti dostavljene u pisanoj formi.

6. Nacrt Zakona o izmjenama i dopunama Zakona o unutrašnjoj trgovini

Nacrt Zakona utvrdila je Vlada Federacije BiH.

Nacrt Zakona razmatrala su nadležna radna tijela i dostavila izvještaje.

U raspravi je učestvovala: Jasmina Zubić.

Predložen je zaključak o kojem su se zastupnici izjašnjavali.

Sa 52 glasa za, 17 glasova protiv i uz tri uzdržana glasa, usvojen je sljedeći:

Z A K L J U Č A K

Predstavnički dom Parlamenta Federacije BiH prihvata Nacrt Zakona o izmjenama i dopunama Zakona o unutrašnjoj trgovini i smatra da može poslužiti kao dobra osnova za izradu prijedloga Zakona.

Zadužuje se predlagač da provede javnu raspravu u trajanju od 45 dana, te da prilikom izrade prijedloga Zakona ima u vidu sve sugestije, primjedbe i prijedloge iznesene u raspravi kao i one koje su dostavljene ili će biti dostavljene u pisanoj formi.

7. Prijedlog Odluke o utvrđivanju Programa statističkih istraživanja od interesa za Federaciju BiH za period 2017.-2020. godina,

Prijedlog Odluke dostavila je Vlada Federacije BiH.

Prijedlog Odluke razmatrala su nadležna radna tijela i dostavila izvještaje.

U raspravi niko nije učestvovao.

Sa 59 glasova za, osam glasova protiv i uz pet uzdržanih glasova, usvojen je Prijedlog Odluke o utvrđivanju Programa statističkih istraživanja od interesa za Federaciju BiH za period 2017.-2020. godina.

8. Prijedlog Odluke o davanju saglasnosti na obračun sredstava u zdravstvu u Federaciji BiH za 2015. godinu,

Prijedlog Odluke dostavila je Vlada Federacije BiH.

Prijedlog Odluke razmatala su nadležna radna tijela i dostavila izvještaje.

U raspravi niko nije učestvovao.

Nakon glasanja o ovoj tački dnevnog reda, Ismet Osmanović izrazio je sumnju u rezultate glasanja, te je sa 56 glasova za, dva glasa protiv i uz 15 uzdržanih glasova usvojen Prijedlog Odluke o davanju saglasnosti na obračun sredstava u zdravstvu u Federaciji BiH za 2015. godinu.

9. Izbor i imenovanja

Komisija za izbor i imenovanja razmatala je: Prijedlog Odluke o imenovanju članova Radne grupe ispred Predstavničkog doma Parlamenta Federacije BiH za rješavanje problema demobilisanih boraca u Federaciji BiH i Prijedlog Odluke o imenovanju članova Regulatorne komisije za energiju u Federaciji BiH.

U ime Komisije Mladen Bošković dao je dodatno obrazloženje. Kazao je da Komisija predlaže da se u Radnu grupu ispred Predstavničkog doma Parlamenta Federacije BiH za rješavanje problema demobilisanih boraca u Federaciji BiH izaberu: Jozo Bagarić, Šemsudin Kavazović i Ramiz Meša. U Regulatornu komisiju za električnu energiju imenuju se: Jasmin Bešo, Sanela Pokrajčić i Mile Srdanović.

U raspravi su učestvovali: Dževad Adžem, Elvir Karajbić, Munib Jusufović, Ismet Osmanović i Jasmin Kadić.

Sa 53 glasa za, 22 glasa protiv i uz četiri uzdržana glasa, Predstavnički dom je donio Odluku o imenovanju članova Radna grupe ispred Predstavničkog doma Parlamenta Federacije BiH za rješavanje problema demobilisanih boraca u Federaciji BiH.

Sa 59 glasova za, 12 glasova protiv i uz 10 uzdržanih glasova, Predstavnički dom donio je Odluku o imenovanju članova Regulatorne komisije za energiju u Federaciji BiH.

Predsjedavajući je zaključio rad 13. redovne sjednice u 17.59.

Transkript i prijepis transkripta sjednice čine sastavni dio Zapisnika.

v. d. SEKRETARA
PREDSTAVNIČKOG DOMA
PARLAMENTA FEDERACIJE BIH

Stela Ibrović

PREDSJEDAVAJUĆI
PREDSTAVNIČKOG DOMA
PARLAMENTA FEDERACIJE BIH

Edin Mušić